



2. Radunanza cumünela dals 17.4.2019 a las 20.00 in sela polivalenta S-chanf

Presidi: Gian Fadri Largiadèr

Actuar: Gian Luca Vitalini

Preschaints: Preschaints sun 25 votantas e votants

Büro electorel: Maura Romerio Duschletta / Lilian Godly

Tractandas:

1. Protocol
2. Collavuraziun cun las vschinaunchas da Zernez e Val Müstair regard il servezzan da polizia
3. Cunvegna da prestaziun traunter la vschinauncha da S-chanf e la Regiun Malögia concernent «Construcziun e gestiun d'ün center da sport sün glatsch»
4. Ledscha davart il provedimaint d'ova e'l trattamaint da l'ova persa
5. Varia

La glista da tractandas vain approveda sainza objecziuns.

Protocol: Il protocol da la radunanza cumünela dals 20 favrer 2019 vain approvu cun fich granda magiuranza.

6 0.130 Collavuraziuns intercumünelas Collavuraziun cun las vschinaunchas da Zernez e Val Müstair regard il servezzan da polizia

La ledscha da polizia revaisa es entreda in vigur ils 01. schner 2019. La legislaziun surelavureda ho consequenzas decisivas per las vschinaunchas. Sün invid da la vschinauncha da Zernez haun las duos vschinaunchas chantunaisas Val Müstair e S-chanf fat discuors culs schefs da la regiun da la polizia chantunela sur ün'eventuela collavuraziun dal servezzan da polizia. Pels prossems trais ans gniss s-chaffida per las trais vschinaunchas tres la polizia chantunela üna piazza d'80%. La vschinauncha da S-chanf vess probabelmaing da's parteciper cun fr. 18'000.00.

Proposta:

La suprastanza cumünela propuona d'approver la collavuraziun cun las vschinaunchas da Zernez e Val Müstair regard il servezzan da polizia.

Discussiun:

Zieva spiegaziuns dal president cumünel, vegnan auncha fat diversas dumandas our dal ravuogl. Ils duos preschaints sar Marco Steck e sar Andrea Mittner da la polizia chantunela daun adequat resposta süllas dumandas.

Decisiun:

Zieva avair sclarieu tuot las dumandas aviertas decida la radunanza cumünela cun granda magiuranza d'aderir a la proposta da la suprastanza cumünela per üna collavuraziun cun las vschinaunchas da Zernez e Val Müstair regard il servezzan da polizia cumünaivel.

7 0.209 Contrats e cunvegnas Cunvegna da prestaziun traunter la vschinauncha da S-chanf e la Regiun Malögia concernent «Construcziun e gestiun d'ün center da sport sün glatsch»

In occasiun da la votaziun cumünela dals 10 favrer 2019 es gnieu cumpletto l'art. 6 al. 2 dals statüts, resguardand la construcziun e gestiun d'ün center da sport sün glatsch scu incumbenza regiunela, zieva cha las vschinaunchas haun autoriso la regiun da dvanter potenzielmaing activa. Confuorm a l'art. 6 al. 3 dals statüts da la Regiun Malögia succeda il transferimaint da las incumbenzas tres üna cunvegna da prestaziun i'l sen da l'art. 28 dals statüts da la Regiun Malögia. Quista cunvegna obliescha exclusivmaing la vschinauncha partecipada. Cun la preschainta cunvegna da prestaziun transferescha la vschinauncha l'evaluaziun d'ün center da sport sün glatsch a la Regiun Malögia cun las seguintas incumbenzas: - Evaluer il lö, - fixer ün lö, - fer eventuelmaing üna proposta a la vschinauncha dal lö concernent l'adattaziun da l'uorden da basa, - adatter eventuelmaing il plan directiv regiunel. Finanziaziun: per las prestaziuns cha la Regiun Malögia ho da furnir tenor cif. 2.1 es necessari ün import da fr. 300'000.00. Prestaziun da la vschinauncha: la vschinauncha peja üna contribuziun tenor la clev actuela da repartiziun dals cuosts da la Regiun Malögia, per ch'ella possa accumplir las incumbenzas transferidas tres quista cunvegna da prestaziun. Confuorm a la clev actuela da repartiziun dals cuosts da la Regiun Malögia, a basa da l'art. 33 dals statüts da la Regiun Malögia, s'amunta la part da la vschinauncha S-chanf a 3.1%, dimena a fr. 9'300.00.

Proposta:

La suprastanza cumünela propuona d'approver la cunvegna da prestaziun.

Decisiun:

La radunanza cumünela decida cun fich granda magiuranza d'approver la cunvegna da prestaziun traunter la vschinauncha da S-chanf e la Regiun Malögia concernent «Construcziun e gestiun d'ün center da sport sün glatsch».

8 0.110 Legislativa Ledscha davart il provedimaint d'ova e'l trattamaint d'ova persa

La cumischiun „revisa da la constituziun, da las ledschas ed dals uordens da la vschinauncha da S-chanf“ ho elavuro la «Ledscha davart il provedimaint d'ova e'l trattamaint da l'ova persa» (Ledscha ova ed ova persa). Tres quist'elavuraziun haun pudieu gnir surlavuro üna granda part dals artichels our da l'«Uorden da contribuziuns per preparaziun, taxas d'attach e per la gestiun». Las ulteriuras spartas da tema sun

regledas illa ledscha da fabrica cumünela ed illa ledscha da planisaziun dal territori dal chantun Grischun.

Proposta:

La cumischiun propuona:

- L'approvaziun da la ledscha davart il provedimaint d'ova e'l trattamaint da l'ova persa.
- Metter our d'vigur l'«Uorden da contribuziuns per preparaziun, taxas d'attach e per la gestiun»

Discussiun / decisiun:

La radunanza cumünela repassa la ledscha, tar seguaints artichels vain fat la discussiun:

Art. 19 Ova da fabrica

Proposta:

Ün votant fo la proposta da stricher l'inter artichel.

Decisiun:

La radunanza cumünela decida da lascher l'artichel cun 14 cunter 8 vuschs.

Art. 21 Otezza da las contribuziuns da sanaziuns per fabricats (Uorden da contribuziuns per preparaziuns, taxas d'attach e per la gestiun)

Proposta:

Ün votant fo la proposta da lascher la taxa da 2% chi serva a la renovaziun ed a l'adattaziun da la rait da chanelisaziun.

Decisiun:

La radunanza cumünela decida cun 13 cunter 7 vuschs da stricher la taxa illa nouva ledscha scu propost da la cumischiun.

Proposta:

Zieva animeda discussiun e singulas propostas da müdamaints approvescha la radunanza cumünela seguaintas propostas da müdamaints:

Art. 35 Geners da taxas e tariffas da taxas

¹Pel provedimaint d'ova e l'allontanamaint da l'ova persa vegnan inchaschedas las seguaintas taxas:

a) Immobiglias colliedas

Taxas d'üna vouta

- Taxa da colliaziun (art. 37)

Taxas chi's repetan

- Taxa da basa (art. 42)
- Taxa tenor quantited (art. 43)
- ~~Fit pels quintaduors d'ova (art. 17)~~

b) Immoiglias na colliedas

Taxas d'una vouta

- Taxa per l'ova da stüzzer fö (art. 38)

Taxas chi's repetan

- Taxa tenor quantited ova persa (art. 44)

c) Ulteriuras taxas

- ~~Fit pels quintaduors d'ova (art. 17)~~
- Taxa per l'ova da fabrica (art. 19)
- Taxa per retrer ova da l'idrant (art. 21)
- Taxa da colliaziun speciela (art. 39)

Art. 43 Taxas tenor quantited per immoiglias colliedas

¹Las taxas tenor quantited chi sun da pajer per tuot las immoiglias colliedas vegnan calcoladas tenor las spinas d'ova e tenor las tariffas per la taxa tenor quantited chi sun fixadas in l'orden da taxas.

UORDEN DA TARIFFAS (ART. 35 AL.3) AGIUNTA a basa da l'art. 35 al. 2

C. Ulteriuras taxas

1.1 Fit da quintadur - Taxa tenor quantited (Art. 17) (quint annuel)

fr. 50.00 / quintadur ed an - fr. 0.10 / m³ incl. ISP

1.2 Taxa per ova da fabrica (art. 19) (quint annuel)

- fr. 0.10 / m³ (na manzuno illa ledscha da fabrica) incl. ISP

1.3 Taxa per retrer ova da l'idrant (art. 21) (quint annuel)

- fr. 0.10 / m³ incl. ISP

1.4 Taxa da colliaziun speciela (art.39)

- tenor decisiun radunanza cumünela

Decisiun:

La radunanza cumünela approvescha cun fich gronda magiuranza la «Ledscha davart il provedimaint d'ova e'l trattamaint da l'ova persa», e metta our'd funcziun il vegl «Uorden da contribuziuns per preparaziuns, taxas d'attach e per la gestiun» da l'an 1992.

9 9.999 Varia

Il president spiega regard la serreda da la via a Cinuos-chel (Chà Chapun) in connex culla fabrica da la lingia d'ova davent da la chesa Tester fin tar la via chantunela. La düreda da quista serreda es da Pasqua fin in lügl 2019.

Il president comunichescha cha'l stedi as-cher da la via chantunela tar la deponia nu cuntantescha. L'ucb es però gnieu aviso da cunagir la via uschè svelt pussibel. Impü spiega il president eir sur dal fabricat da la halla da deposit da la resgia. La fabrica vain glivreda il

principi da gën e la resgia po cumanzer cullas lavuors vi da la maschina per fer laina arduonda.

Il president spiega eir auncha cha las lavuors d'infrastructura aint in Susauna vegnan gliverdas illa prüma mited dal mais lügl 2019.

Ün votant fo auncha üna dumanda regard l'ordinauziun da trafic chi'd es gnieu publicheda illa Posta Ladina. El voul savair scu cha la situaziun da parker saja in futur tal parkegi aint in Prasüras. Il depüto Roman Parli spiega, cha la düreda vegna fixeda aint in ün reglamaint separo, casua cha la radunanza cumünela dals 15 november 2017 ho decis, cha'l parker sün tuot il territori da la vschinauncha da S-chanf dess esser per princip gratuit.

Il president serra la radunanza a las 22.35 ed ingrazcha a tuot ils preschaints per lur cumparsa.

In buna fè

Il president:

L'actuar:

G. Largiadèr

G. L. Vitalini